

**Wong Desak Persidangan Perwakilan SUPP Ditunda  
Bernama  
29 Apr, 2014**

KUCHING, 29 April (Bernama)-- Pengerusi Parti Rakyat Bersatu Sarawak (SUPP) cawangan Sibu Datuk Seri Wong Soon Koh mahu supaya persidangan perwakilan tiga tahun sekali (TDC) yang dijadualkan pada November tahun ini, ditunda sehingga pemilihan 2011 diisytiharkan sebagai sah.

Wong, yang juga Menteri Kerajaan Tempatan dan Pembangunan Masyarakat Sarawak berkata penangguhan itu bermakna pemilihan cawangan atau parti tidak boleh diadakan buat sementara waktu.

Oleh kerana berlaku banyak kepincangan semasa pemilihan parti pada 2011 yang belum diselesaikan, kami menyerahkannya kepada Pendaftar Pertubuhan (ROS) untuk membuat keputusan.

"Dua cawangan parti (Piasau dan Bekenu) telahpun dibatalkan pendaftaran oleh ROS termasuk cawangan Piasau yang presiden parti (Tan Sri Peter Chin) sendiri adalah pengerusi," kata beliau kepada pemberita selepas menghadiri perasmian forum pelajar bagi sekolah menengah persendirian Cina di sini hari ini.

Oleh itu, beliau berkata, SUPP tidak harus meneruskan cadangan untuk mengadakan persidangan perwakilan akan datang.

Berhubung kenyataan Ketua Menteri Tan Sri Adenan Satem bahawa musuh sebenar SUPP ialah DAP dan bukan dari kalangan pemimpin dan anggota parti, Wong berkata ia adalah komen yang adil daripada ketua Menteri.

"Puak kami bukan berjuang bagi jawatan dalam parti tetapi apa yang kami mahu ialah membetulkan segala kepincangan yang dilakukan oleh kumpulan lain (puak Chin) pada pemilihan parti pada 2011," kata Wong.

Wong juga bersetuju dengan formula supaya kedua-dua kumpulan mempunyai jumlah perwakilan yang sama dalam jawatankuasa kerja pusat parti (CWC) sementara SUPP menyelesaikan isu yang membabitkannya dan membuat persediaan bagi pemilihan parti akan datang.

Beliau berkata formula itu diterima kumpulannya kerana ini akan memberi masa

yang cukup kepada kedua-dua pihak untuk memastikan bahawa persidangan perwakilan tiga tahun sekali dan pemilihan cawangan berlangsung secara bebas dan adil.

Penangguhan persidangan perwakilan tiga tahun sekali itu dibenarkan jika kedua-dua pihak bersetuju dan mendapat persetujuan daripada ROS, kata beliau.

Wong bersama lima anggota yang dipilih memulau pemilihan parti pada Disember 2011 dan membuat laporan kepada ROS dengan mendakwa berlaku kepincangan.

Mereka enggan menerima Chin dan kumpulanannya sebagai anggota jawatankuasa sambil berkata pemilihan mereka adalah tidak sah.

-- BERNAMA.

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1034558>